

Broj: 03-02-893/2016
Sarajevo, 19.10.2017. godine

PARLAMENT FEDERACIJE
BOSNE I HERCEGOVINE

- Dom naroda-
gđa Lidija Bradara, predsjedavajuća

Bosna i Hercegovina
FEDERACIJA BOSNE I HERCEGOVINE
PARLAMENTI FEDERACIJE BOSNE I HERCEGOVINE
DOM NARODA
SARAJEVO

Primitjeno:	20.10.	2017	god
Broj:	02 -	02 -	1465 / 16

10x

PREDMET: Izjašnjenje Vlade Federacije Bosne i Hercegovine

Poštovana,

U skladu sa članom IV.B.3.7.c) (III) Ustava Federacije BiH, a u vezi sa odredbama člana 183. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03 i 21/09), u prilogu Vam dostavljam **Izjašnjenje Vlade Federacije Bosne i Hercegovine o amandmanima na Prijedlog zakona o računovodstvu i reviziji u Federaciji Bosne i Hercegovine, koje su podnijeli Admir Hadžipašić (15 amandmana) i Almedin Aliefendić (1 amandman), delegati u Domu naroda Parlamenta Federacije BiH, a koje je Vlada Federacije Bosne i Hercegovine utvrdila na 123. sjednici, održanoj 19.10.2017. godine.**

S poštovanjem,



PREMIJER

Fadil Novalić

Prilog: kao u tekstu

**Cc: Federalno ministarstvo finansija-
Federalno ministarstvo financija
gđa Jelka Milićević, ministar**

Na osnovu člana 73. Poslovnika o radu Vlade Federacije Bosne i Hercegovine-Prečišćeni tekst ("Službene novine Federacije BiH", br: 6/10, 37/10 i 62/10), a u vezi sa odredbama člana 183. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03 i 21/09), nakon razmatranja amandmana na Prijedlog zakona o računovodstvu i reviziji u Federaciji Bosne i Hercegovine, koje su podnijeli: Admir Hadžipašić (15 amandmana) i Almedin Aliefendić (1 amandman), delegati u Domu naroda Parlamenta Federacije BiH, Vlada Federacije Bosne i Hercegovine je, na 123. sjednici održanoj 19.10.2017. godine, utvrdila sljedeće:

IZJAŠNJENJE

o amandmanima na Prijedlog zakona o računovodstvu i reviziji u Federaciji Bosne i Hercegovine, koje je podnio Admir Hadžipašić, delegat u Domu naroda Parlamenta Federacije Bosne i Hercegovine

AMANDMAN I

Član 23.

(Usaglašavanje potraživanja i obaveza)

Član 23. stav (4) treba da glasi:

„(4) Potraživanja i obaveze se usaglašavaju sa stanjem na dan 31. oktobra/listopada tekuće godine, s tim da se usaglašavanja - potvrđivanja za potrebe revizije finansijskih izvještaja vrše sa stanjem na dan 31. decembra/prosinca.“

IZJAŠNJENJE

Amandman se ne prihvata

Obrazloženje

Usaglašavanje potraživanja i obaveza je neophodna radnja koju moraju provesti sva pravna lica, obveznici predaje finansijskih izvještaja, radi prikaza stvarnog finansijskog stanja na dan 31.12. i isto predstavlja osnov za sastavljanje finansijskih izvještaja.

AMANDMAN II

Član 32.

(Kvalificirano lice za sačinjavanje finansijskih izvještaja)

Član 32. stav (2) treba da glasi:

„(2) Vođenje poslovnih knjiga i sačinjavanje finansijskih izvještaja pravno lice može povjeriti ugovorom, uz određenu naknadu:

- a) drugom pravnom licu koje je registrovano za pružanje knjigovodstvenih i računovodstvenih usluga i koje ima sve potrebne resurse za pravilno, kvalitetno i efikasno obavljanje tih usluga, te koje ima zaposlena kvalificirana lica koja su odgovorna za vođenje poslovnih knjiga i sačinjavanje finansijskih izvještaja i koja ispunjavaju i druge uslove utvrđene ovim zakonom i općim aktom pravnog lica, ili
- b) poduzetniku registrovanom za pružanje knjigovodstvenih i računovodstvenih usluga koji ima sve potrebne resurse za pravilno, kvalitetno i efikasno obavljanje tih usluga, a koji je sam kvalificirano lice ili zapošljava drugo kvalificirano lice.“

IZJAŠNJENJE

Amandman se prihvata

AMANDMAN III

Član 32. stav (3) treba da glasi:

„(3) Lica koja sačinjavaju finansijske izvještaje iz stava (2) ovog člana obavezno su kvalificirana lica koja su zaposlena u pravnom licu iz stava (2) ovog člana, odnosno kvalificirana lica koja su poduzetnici ili koja su zaposlena kod poduzetnika registrovanih za pružanje knjigovodstvenih i računovodstvenih usluga iz stava (2) ovog člana.“

IZJAŠNJENJE **Amandman se prihvata**

AMANDMAN IV

U članu 32. stav (4) treba brisati.

IZJAŠNJENJE **Amandman se prihvata**

AMANDMAN V

U članu 32. stav (7) treba brisati.

IZJAŠNJENJE **Amandman se ne prihvata** **Obrazloženje**

Imajući u vidu dosadašnju praksu gdje se dešavalo da pojedine certificirane računovođe potpisuju i do 90 finansijskih izvještaja (iako znamo da je nemoguće da iste sastave u periodu od kraja poslovne godine do roka za predaju finansijskih izvještaja), radi povećanja odgovornosti i dužne pažnje kod sastavljanja finansijskih izvještaja, a u cilju unaprjeđenja finansijskog izvještavanja, predložena odredba se odnosi samo na finansijske izvještaje srednjih i velikih pravnih lica, dok nema ograničenja za sastavljanje i potpisivanje finansijskih izvještaja za mikro i mala pravna lica.

AMANDMAN VI

Član 32. stav (5) treba da glasi:

„(5) Pod pojmom kvalificirano lice iz stava (3) ovog člana podrazumijevaju se lica koja posjeduju važeću licencu certificiranog računovođe ili certificiranog računovodstvenog tehničara, u skladu sa odredbama ovog zakona, pod uslovom da su prethodno registrovana u registrima iz člana 35. ovog zakona.“

Paralelno s tim, u članu 44. iza stava (4) treba dodati novi stav (5) koji glasi:

„(5) Izuzetno od odredbe stava (4) ovog člana, finansijski izvještaji mikro pravnih lica, kao i finansijski izvještaji udruženja i drugih sličnih neprofitnih pravnih lica, mogu biti ovjereni potpisom i pečatom certificiranog računovodstvenog tehničara koji sadrži naziv „certificirani računovodstveni tehničar“, njegovo ime i prezime, kao i broj važeće licence.“

IZJAŠNJENJE **Amandman se ne prihvata** **Obrazloženje**

Imajući u vidu da ovjeru finansijskih izvještaja vrši certificirani računovođa sa važećom licencom i da odgovara, u skladu sa pravilima struke, za istinito i fer prikazivanje finansijskog položaja i uspješnosti poslovanja pravnog lica čije finansijske izvještaje sastavlja i potpisuje, te s obzirom da su značajno povećani pragovi za razvrstavanje pravnih lica u odnosu na važeći Zakon o računovodstvu i reviziji u Federaciji BiH i da će u skladu sa novim kriterijima razvrstavanja biti većina (oko 75%) mikro

pravnih lica, neprihvatljivo je da certificirani računovodstveni tehničar može ovjeravati finansijske izvještaje mikro pravnih lica kao i certificirani računovođa.

AMANDMAN VII

Član 44. (Predaja izvještaja)

U članu 44. stav (8) treba brisati.

IZJAŠNJENJE Amandman se ne prihvata Obrazloženje

Navedena odredba je jasna i nedvosmislena i primjenjuje se samo u slučaju kad pravno lice koje je registrovano u tekućoj poslovnoj godini i koje do 31.12. tekuće poslovne godine nije imalo drugih poslovnih promjena osim uplate obaveznog depozita na svom računu i u torn slučaju dužno je, o toj činjenici, odnosno o svom finansijskom stanju, obavjestiti Finansijsko-informatičku agenciju. Jasno je da je pravno lice koje je registrovano u tekućoj poslovnoj godini i koje je do 31.12. tekuće poslovne godine osim uplate obaveznog depozita imalo bilo kakve druge promjene, bilo putem računa ili mimo računa, obavezno sačiniti i predati finansijske izvještaje navedenoj agenciji.

AMANDMAN VIII

Članovi 54. do 56. (Savjet za računovodstvo)

Ove članove treba brisati.

IZJAŠNJENJE Amandman se ne prihvata Obrazloženje

U vezi sa datim novim nadležnostima Profesionalnom tijelu u skladu sa članom 53. st. (2) i (3) Prijedloga Zakona o računovodstvu i reviziji u Federaciji BiH, Savjet za računovodstvo prati i nadzire aktivnosti Profesionalnog tijela u provođenju kontrole kvaliteta pruženih knjigovodstvenih i računovodstvenih usluga, te razmatra izvještaje o radu i stanju u oblasti računovodstva, ali i istovremeno daje mišljenja na nacрте i prijedloge propisa iz oblasti računovodstva.

AMANDMAN IX

U članu 5. Prijedloga Zakona o računovodstvu i reviziji Federacije Bosne i Hercegovine, stav 4. mijenja se i isti glasi:

4) U mala pravna lica razvrstavaju se ona pravna lica koja na dan sačinjavanja finansijskih izvještaja ne prelaze granične vrijednosti najmanje dva od sljedećih kriterija:

- a) prosječna vrijednost poslovne imovine na kraju poslovne godine je do 2.000.000,00 KM;
- b) ukupan godišnji prihod je do 4.000.000,00 KM;
- c) prosječan broj zaposlenih u godini za koju se podnosi finansijski izvještaj je do 49

U članu 5. Prijedloga Zakona o računovodstvu i reviziji Federacije Bosne i Hercegovine, stav 10. mijenja se i isti glasi:

10) Prosječna vrijednost poslovne imovine izračunava se tako što se sabere neto knjigovodstvena vrijednost poslovne imovine na početku i na kraju obračunskog perioda i podijeli sa brojem dva, a prosječan broj zaposlenih tako što se ukupan zbir zaposlenih krajem svakog mjeseca, uključujući i zaposlene izvan teritorije Federacije, podijeli sa brojem mjeseci u obračunskom periodu. Gubitak iznad visine kapitala NE ulazi u prosječnu vrijednost poslovne imovine“.

IZJAŠNENJE
Amandman se ne prihvata
Obrazloženje

Izmjenama se predlažu niže granične vrijednosti za mala pravna lica na način da se prosječna vrijednost poslovne imovine umanjuje sa 4.000.000,00 KM na 2.000.000,00 KM, a ukupan godišnji prihod sa 8.000.000,00 KM na 4.000.000,00 KM. Na ovaj način bi sva pravna lica koja imaju prihod između 4.000.000,00 KM i 8.000.000,00 KM i koji imaju prosječnu vrijednost poslovne imovine između 2.000.000,00 KM i 4.000.000,00 KM bi bila razvrstana u srednja pravna lica koja podliježu obaveznoj reviziji finansijskih izvještaja.

S obzirom da se kriteriji za razvrstavanje pravnih lica u važećem Zakonu o računovodstvu i reviziji u Federaciji BiH nisu mjenjali već punih sedam godina i da je ekonomska moć pravnih lica daleko viša, uvažili smo prijedloge pristigle tokom javne rasprave da je potrebno uskladiti klasifikaciju pravnih lica sa preporukama EU i Zakonom o poticanju malog gospodarstva Federacije BiH.

Kriteriji za razvrstavanje pravnih lica u Prijedlogu Zakona su dvostruko niži u odnosu na kriterije razvrstavanja pravnih lica propisane Direktivom 2013/34/EU pri čemu je obrađivač propisa vodio računa o stepenu ekonomske razvijenosti u našoj zemlji i namjerom da se postepeno povećavaju navedeni kriteriji do ulaska BiH u EU.

Kada govorimo o aktivni bilansa stanja bitno je napomenuti da je pojam aktive znatno širi od pojma sredstva, gdje aktiva predstavlja knjigovodstveno bilansni pojam, dok se pod pojmom sredstava koja se priznaju u bilansu stanja, u skladu sa Međunarodnim računovodstvenim standardima (MRS), podrazumijevaju ona sredstva od kojih se očekuje da će vjerovatno priticati buduća ekonomska korist u pravno lice i kada takva sredstva imaju cijenu ili vrijednost koja se može pouzdano izmjeriti. U aktivu bilansa stanja ulaze i druge vrijednosti, a koje su u računovodstvenom smislu neophodne za izravnavanje stavki aktive i pasive, kao što je to gubitak iznad visine kapitala koji, shodno odredbi člana 24. Pravilnika o Kontnom okviru, sadržaju kontna i primjeni Kontnog okvira za privredna društva („Službene novine Federacije BiH“, broj: 82/10), predstavlja iznos viška rashoda nad prihodima iznad visine kapitala/trajnih izvora.

AMANDMAN X

U slučaju da se ne usvoji Amandman broj IX (u vezi promjena u članu 5. stav 4. prijedloga Zakona), predlažem da se izvrši izmjena i dopuna člana 57. Prijedloga Zakona i to na način da se iza stava 2., dodaje se novi stav 3., koji glasi:

(3) Obaveznoj reviziji podliježu finansijski izvještaji i konsolidovani finansijski izvještaji pravnih lica razvrstanih u mala pravna lica ako prosječna vrijednost poslovne imovine na kraju poslovne godine iznosi preko 2.000.000 KM, i ukupan godišnji prihod preko 4.000.000 KM.

Dosadašnji stav (3) člana 57. Prijedloga Zakona postaje stav (4), te se isti mijenja i glasi:

(4) Ukoliko nisu obuhvaćeni stavom (2) ovog člana, obaveznoj reviziji podliježu i finansijski izvještaji subjekata od javnog interesa, definiranih ovim zakonom i finansijski izvještaji drugih pravnih lica, ukoliko je to propisano posebnim propisima kojim se uređuje njihovo poslovanje, te organizacije, javne institucije i javne ustanove koje nisu obuhvaćene godišnjim planom revizije Ureda za reviziju institucija u FBiH.

Dosadani stav (4) i (5) Prijedloga Zakona postaju stavovi (5) i (6), dok stav (6) postaje stav (7) i isti se mijenja i glasi:

(7) Pravna lica koja se razvrstavaju, u skladu sa članom 5. ovog zakona u mikro pravna lica i mala pravna lica čija je prosječna vrijednost poslovne imovine do 2.000.000 KM i ukupan godišnji prihod do 4.000.000 KM, mogu odlučiti da se revizija njihovih finansijskih izvještaja vrši u skladu sa odredbama ovog zakona.

IZJAŠNENJE
Amandman se ne prihvata
Obrazloženje

Obrazloženje amandmana je u suprotnosti sa Direktivom 2013/34/EU kojom je propisano da su obveznici revizije finansijskih izvještaja subjekti od javnog interesa, kao i ostala srednja i velika pravna lica koja nisu subjekti od javnog interesa bez obzira na oblik organizovanja.

AMANDMAN XI

U članu 37. Prijedloga Zakona o računovodstvu i reviziji FBiH, stav 3. mijenja se i isti glasi:

3) Bilješke uz finansijske izvještaje iz stava 1. tačka e) i stava c točka c ovog Zakona se obavezno sastavljaju u skladu s Međunarodnim standardima Finansijskog Izvještavanja ili u skladu s Međunarodnim standardom finansijskog izvještavanja za mala i srednja poduzeća.

Dosadašnji stav (4) se briše, dok dosadašnji stavovi (5) i (6) Prijedloga Zakona postaju stavovi (4) i (5).

IZJAŠNENJE

Amandman se ne prihvata

Obrazloženje

Ovom odredbom je izvršeno usklađivanje sa odredbom Direktive 2013/34/EU, što je i sastavni dio Uporednog prikaza o usklađenosti, a potvrđeno je Izjavom o usklađenosti.

Posebna pažnja je u Direktivi posvećena i obaveznom sastavljanju Bilješki uz finansijske izvještaje svih pravnih lica, čak i mikro i mala pravna lica su obaveznici sastavljanja Bilješki sa minimalnim elementima u sadržaju, koji su dati u odredbi ovog člana Zakona.

AMANDMAN XII

U članu 60. Prijedloga Zakona o računovodstvu i reviziji FBiH, iza stava 3., dodaju se novi stavovi (4) i (5) koji glase:

4) Revizorske usluge obavljaju se neovisno, samostalno i objektivno u skladu s ovim Zakonom, Međunarodnim revizijskim standardima, drugim propisima i pravilima.

(5) U obavljanju zakonske revizije finansijskih izvještaja srednjih i malih poduzetnika a koji nisu subjekti od javnog interesa, ovlašteni revizor i revizorsko društvo primjenjuju Međunarodne revizijske standarde i pravila struke na način koji je proporcionalan opsegu i složenosti poslovanja poduzetnika čiji su finansijski izvještaji predmet revizije.

IZJAŠNENJE

Amandman se ne prihvata

Obrazloženje

Članom 57. Zakona propisano je da se revizija finansijskih izvještaja obavlja u skladu sa ovim zakonom, MSR uz poštivanje načela profesionalne etike i pravila revizorske struke, te drugih pravila i propisa koji regulišu ovu oblast.

Drugi dio amandmana je u suprotnosti sa Direktivom 2013/34/EU kojom je propisano da su obvezinici revizije finansijskih izvještaja subjekti od javnog interesa, kao i ostala srednja i velika pravna lica koja nisu subjekti od javnog interesa bez obzira na oblik organizovanja.

AMANDMAN XIII

U članu 61. Prijedloga Zakona o računovodstvu i reviziji FBiH, stav 2. i 7. mijenja se i isti glasi:

(2) Ispit za stjecanje zvanja ovlaštenog revizora polaže se prema programu Komisije. Stručno osposobljavanje za polaganje revizorskog ispita organizira i provodi Revizorska komora FBiH. Revizorska komora FBiH detaljnije propisuje pravilnikom uslove, program i način stručnog osposobljavanja za polaganje revizorskog ispita i iznos naknade za stručno osposobljavanje. Na predmetni pravilnik prethodnu saglasnost daje Ministarstvo finansija.

(7) Ovlašteni revizor je dužan da osigura kontinuirano profesionalno usavršavanje iz stava (6) ovog člana, sa minimalnim fondom sati utvrđenim Zakonom o računovodstvu i reviziji Bosne i Hercegovine u prethodne tri godine od podnošenja zahtjeva za izdavanje licence, s tim da je 50% navedenog fonda sati provedeno na usavršavanju u oblasti revizije na usavršavanju u oblasti revizije prema programu koji donosi Revizorska komora FBiH.

IZJAŠNENJE
Amandman se ne prihvata
Obrazloženje

U skladu sa Zakonom o računovodstvu i reviziji Bosne i Hercegovine („Službeni glasnik BiH“, broj: 42/04), Komisija za računovodstvo i reviziju BiH provodi jedinstveni Program za sticanje kvalifikacija i obuku na nivou BiH, koja je Odlukom broj: 05/07 delegirala svoje obaveze sprovođenja jedinstvenog programa za sticanje kvalifikacija i obuku na Savez računovođa, revizora i finansijskih radnika Federacije BiH.

AMANDMAN XIV

U članu 63. Prijedloga Zakona o računovodstvu i reviziji FBiH, iza stava 4., dodaje se novi stav (5) koji glasi:

(5) Zabranjena je svaka ugovorna odredba kojom se ograničava izbor obvezniku zakonske revizije na način da se obavljanje zakonske revizije mora ugovoriti s određenim revizorskim društvom određene kategorije ili s popisa revizorskih društava. Sve takve odredbe ugovora su ništetne.

IZJAŠNENJE
Amandman se ne prihvata
Obrazloženje

Zakoni koji regulišu finansijski sektor su lex specialis i propisuju posebne uslove i zahtjeve za društva za reviziju koja vrše reviziju finansijskih izvještaja subjekta koji su predmet revizije.

AMANDMAN XV

U članu 68. Prijedloga Zakona o računovodstvu i reviziji FBiH, stav 1.,2. i 6. mijenja se i isti glasi:

(1) Izvještaj neovisnog revizora sastavlja se u skladu sa MSR i uključuje u Izvještaj o obavljenoj reviziji. Izvještaj neovisnog revizora sastavljen u skladu s Međunarodnim revizijskim standardima je javan.

(2) Neovisni revizor o rezultatima revizije izvještava nadalje u pisanom obliku u obliku Izvještaja o obavljenoj reviziji. Izvještaj o obavljenoj reviziji je namijenjen zakonskim zastupnicima i onima koji su zaduženi za upravljanje, odnosno nije namijenjen za javnost osim ako to ne dopuste zakonski zastupnici. U Izvještaj o obavljenoj reviziji se uključuje Izvještaj neovisnog revizora. Pored toga, Izvještaj o obavljenoj reviziji sadrži minimum sljedeće:

a) Podjelu i objašnjenje stavki sadržanih u finansijskim izvještajima

b) Objašnjenje negativnih promjena finansijskog položaja i finansijske uspješnosti subjekta u odnosu na prethodni period sa značajnim utjecajem na rezultat poslovanja subjekta. Ako ne postoje negativne promjene u izvještaju o obavljenoj reviziji se daje izričita izjava o tome.

c) Ako revizor utvrdi pri provođenju svojeg angažmana činjenice koje ugrožavaju poslovanje revidiranog subjekta ili njegov razvitak, ili značajno nepoštivanje zakona, ugovora o osnivanju ili statuta od strane zakonskih zastupnika ili uposlenika, o istom mora izričito izvjestiti. Dodatno, revizor mora izvjestiti o značajnim slabostima u internim kontrolama vezanim za računovodstveni sistem. Ako ne postoje navedene činjenice o tome treba dati izričitu izjavu u izvještaju o obavljenoj reviziji.

d) Ako pri provođenju revizije revizor utvrdi da su kod subjekta revizije ispunjeni preduslovi za moguću reorganizaciju u svom izvještaju treba navesti rezultat koeficijenta vlastitog finansiranja i fiktivnog roka potrebnog za izmirenje obaveza izračunatog kao neto obaveze/ novčani tok iz operativne aktivnosti.

e) posebna upozorenja i probleme na koje licencirani ovlašteni revizor želi da ukaže, ali bez izražavanja mišljenja sa rezervom;

f) pitanja na koja je licencirani ovlašteni revizor upozorio bez davanja kvalifikovanog mišljenja.

(6) Licencirani ovlašteni revizor koji je sastavljao revizorski izvještaj, na poziv ili na lični zahtjev, mora o svom trošku prisustvovati sjednici organa upravljanja pravnog lica kada se razmatra izvještaj o obavljenoj reviziji tog pravnog lica i isti prezentirati zakonskim zastupnicima i onima koji su zaduženi za upravljanje

IZJAŠNENJE
Amandman se ne prihvata
Obrazloženje

Nije prihvaćen amandman obzirom da je ovaj član potpuno usklađen sa članom 28. Direktive 2014/56/EU i propisuje minimalne elemente u izvještaju, a imajući u vidu našu obavezu transponiranja odredbi EU legislativne u domaće zakonodavstvo u skladu sa zaključenim Sporazumom o stabilizaciji i pridruživanju.

IZJAŠNENJE
o Amandmanu na Prijedlog zakona o računovodstvu i reviziji u Federaciji Bosne i Hercegovine, koji je podnio Almedin Aliefendić, delegat u Domu naroda Parlamenta Federacije Bosne i Hercegovine

AMANDMAN I

Član 32.
(Kvalificirano lice za sačinjavanje finansijskih izvještaja)

U članu 32. stav (2) mijenja se i glasi:

(2) Vođenje poslovnih knjiga i sastavljanje finansijskih izvještaja pravno lice može povjeriti ugovorom, uz određenu naknadu, drugom pravnom licu ili poduzetniku registrovanim za pružanje knjigovodstvenih i računovodstvenih usluga, koji imaju sve potrebne resurse za pravilno, kvalitetno i efikasno obavljanje tih usluga, te ima zaposlena kvalificirana lica koja su odgovorna za vođenje poslovnih knjiga i sačinjavanje finansijskih izvještaja, ili poduzetniku registrovanom za pružanje knjigovodstvenih i računovodstvenih usluga koji ima sve potrebne resurse za pravilno, kvalitetno i efikasno obavljanje tih usluga, a koji je kvalificirano lice ili ima zaposleno kvalificirano lice, a koji ispunjavaju i druge uslove utvrđene ovim zakonom i internim općim aktom.

U stavu (3) ispred riječi „zaposlena“ dodaju se riječi: „poduzetnici ili su“.

Stav (4) briše se.

Dosadašnji stavovi 5., 6., 7. i 8. postaju stavovi 4., 5., 6. i 7.

IZJAŠNENJE
Amandman se ne prihvata
Obrazloženje

Predloženi tekst člana 32. stav (2) je nejasan zbog ponavljanja riječi „poduzetniku“ dva puta u istoj rečenici, što je nepotrebno i stvara konfuziju.

V. broj: 1361 /2017
19.10.2017. godine
Sarajevo



PREMIJER

Fadil Novalić